

REGIONAL NEWS BULLETIN

HEADLINES (MORNING)

Date – 30/06/2025

Time - 7:30 -7:40Hrs

- Vawiin June ni 30 hi India sorkar leh MNF te'n inremna an ziahna ni 'Remna Ni' a ni a, Mizoramin remna a neih kum 39-na hi Mizo Zirlai Pawl (MZP) huaihawtin Aizawla Sipai Lammualah hman a ni ang.
- Mizoram Larsap, General (Rtd) Vijay Kumar Singh chu nimin khan Panchshil Bombay Sappers Soldierathon 2025-ah khuallian a ni a, soldierathon-a tel mi 4,500 chuangte chu a vailiam.
- Mizoram Universal Health Care Scheme (MUHCS) ah mipui nawlpui tana inziah luh theih hun chu vawiin June ni 30 thleng hi hawn a ni.
- Union Minister of State for Civil Aviation Murlidhar Mohol chuan Air india flight AI 171 chetsual chhan chhui mekah firfiak-te inrawlhna a awm lo a ti.

<><><>

PEACE DAY

Vawiin June ni 30 hi India sorkar leh MNF te'n inremna an ziahna ni 'Remna Ni' a ni a, Mizoramin remna a neih kum 39-na hi Mizo Zirlai Pawl (MZP) huaihawtin Aizawla Sipai Lammualah hman a ni ang.

MZP President H. Lalthianghlina chuan Remna Ni hman tur hian Mizo mipui zawng zawng a sawm a, ruahman dan chuan chawhma dar 11:00-ah hun hman tan tur niin, chief minister Pu Lalduhoma chu khuallian a ni ang.

Remna Ni chungchangah hian MZP chuan thuchhuah an lo siam tawh a, an thuchhuaha an tarlan dan chuan Remna Ni chu Mizo mipui te tan a pawimawh em em a, lungrual taka hman tur ni mah se a bik takin political party-te ngaihdan a inang lo a, lungrual taka hun hman a harsa thin. Hei vang hian political party awn lam nei lo Zirlai pawl chuan kum 2018 atangin kum tin Remna Ni hi a buatsaih ta niin an sawi.

MZP chuan an huaihawtna hnuaiah Party hrang hrang pawhin lungrual takin an hman ho thei niin an sawi a, a hun laia sorkarna fawng chelhtu apiang an inti neitu thin nia sawiin, hun lo kal zel turah pawh Mizo mipui ten lungrual taka hman ho zel theih chu an duhthusam a nih thu an sawi bawk.

MZP hian Remna Ni hi hmun hrang hrangah hmangin, remna a awm theih nana tha thawh hlawk mimal 12 bakah Mizoram Kohhran Hruaitute Committee chu chawimawina an lo hlan tawh a, kuminah erawh mimal emaw pawl emaw chawimawina pek an awm rih lo thung.

<><><>

GOVERNOR

Mizoram Larsap, General (Rtd) Vijay Kumar Singh chu nimin khan Panchshil Bombay Sappers Soldierathon 2025-ah khuallian a ni a, soldierathon-a tel mi 4,500 chuangte chu a vailiam.

Pune-a BEG Centre Parade Ground-ah hun hman niin, marathon hi 'Fitistan - Ek Fit Bharat' buatsaih niin, sipai hliam tuarte enkawlina hmun, Paraplegic Rehabilitation Center, Pune tanpui nana ruahman a ni. Soldierathon hian ram tana martarte leh

hliampui tuarte chawimawi a tum a. Ram pumah ram tana nunna hlu tak hlantute ngaihhlutna, abikin thalaite'n an chin deuh deuh theih nana hmalak chu ngaihpawimawh a ni a. Chhum lo chat lova ram venhim hna thawktu, inpumkhatna leh ram inrelbawlna hnan nei kan nihna vawnhim kawnga hmalatu sipaite ngaihsanna thinlung mipuiteah tuh a tum a ni.

Bombay Sappers Soldierathon hi marathon mai ni lo, hnam tana martarte zahna bakah India ram hrisel leh inpumkhat zawk siam kawnga hmalakna a ni a. He marathon hi KM10, KM5 leh KM3 category-ah then a ni a, mi 4,500 chuang telin, naupang thla 7 atanga kum 82 mi thlengin an tel a ni.

<><><>

MUHCS

Mizoram Universal Health Care Scheme (MUHCS) ah mipui nawlpui tana inziah luh theih hun chu vawiin June ni 30 thleng hi hawn a ni.

Online-a sum chawia inziahlul theihna hun hi June ni 30 thleng hawn mek a ni a, Inrinni leh vawiin chu sorkar chawlh a nih avangin offline a sub centre leh hmun danga inziahlul theih hun chu Zirtawpni khan a tawp a, online hmang erawhin vawiin thleng hun hawn a la ni.

April Ni 1 atanga MUHCS kalpui a nih atangin damlo Sing 1, Sang 2 leh 864 enkawl a ni tawh a, damlo enkawlna senso sorkarin a pek chhuah tawh chu chengVbc 15 leh Nuai 9 a tling tawh.

Hriat theih chinah June ni 24 thleng khan Mizoram Universal Health Care Scheme - a mi nawlpui sum chawia inziaklut chhungkaw 7,835 an awm tawh a, pensioner inziaklut 9,310 an awm baw. MUHCS hian sorkara thawk nghet a huam bakah, provisional employee CSS leh Grant in-aid atanga hlawh la te pawh a huam a, sorkar laipui in health care scheme a duan Pradhan Mantri Jan Arogya Yojana (PM-JAY) beneficiary’s chhungkaw Nuai 2, Sing 1 Sang 9 leh 72 an awm mek a, hemi hnuaia inziaklut te chu MUHCS hnuaiah inziahlul ve kher a ngai lo a ni.

<><><>

ASF UPDATE

African Swine Fever (ASF) vawk pulhri leng avanga kumina vawk thi zat chuan 5,000 pel tawhin tun dinhmunah 5,044 a tling tawh.

Animal husbandry & veterinary department hotute chuan tun hnai-ah hian ASF vawk pulhri avanga vawk thi leh suat hi a awm pawhin a tlem chho hle niin an sawi a, vawk thi leh suat awm loh ni a awm fo baw. Nimin Pathianni khan Siaha district khaw panga-ah vawk 17 a thi a. Vawk suat erawh chu a awm lo thung.

ASF vawk pulhri hi Lunglei khawpui leh Mamit district a Zawlnuam khua bak thingtlang lama a la darh loh lai-in Siaha leh Lawngtlai-ah chuan district hmunpui bakah thingtlang khaw lamah a darh viau tawh a. District dangah chuan a la darh lo ni a thu dawn a ni. Vawiin thlengin khua leh veng 73 chu vawk pulhri lenna a a puan a ni tawh. Vawk pulhri a darh zel lohna atan vawk 1,631 suat a ni tawh baw.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

COVID

Kar kal ta Zirtawpni khan Aizawl district a naupang pakhatin Covid-19 hri a kai tih hmuhchhuah a nih leh avangin kumin chhungin Mizoramah 3 hri kai hmuhchhuah an awm tawh.

Mizoramah chuan May thla chawhnu herah khan Covid-19 hri kai 2 hmuhchhuan an ni a. He’ng mi 2-te hi Aizawl district a cheng an ni a, Zoram Medical College & Hospital-a enkawl an nih hnu-ah June ni 5 khan dam takin damdawi-in an chhuahsan leh tawh a ni. Zirtawpni a hri kai hmuhchhuah thar hi enkawl mek a ni a. A natna a lang chhuak lo niin an sawi. Heti chung hian Integrated Disease Surveillance Programme (IDSP) hnathawkte chuan Covid dinhmun hi chik taka an ngaihven reng thu leh central sorkara Ministry of Health & Family Welfare thuneitute nen an inbiak pawh reng thu an sawi a. A tul dan a zira Mizoram pawn atanga lo lutte lo endik pawh kalpui thei turin ruahmanna siam turin an inpeh reng niin an sawi a ni.

Kum 2020 bul lam atanga Covid hri a len tan atanga tun thleng hian Covid hri kai a rinhlelh sample nuai 19, sing 9, sang 7 leh 641 endik a ni tawh a. Endik zinga mi nuai 2, sing 3 sang 9 leh 638 te chuan Covid an kai tih hmuhchhuah a ni a. An zinga mi 734 te chuan Covid hri hi an thihpui a, mi nuai 2, sing 3, sang 9 leh 903 te erawh chu enkawl dam an ni thung.

<><><>

MOS CIVIL AVIATION :

Union Minister of State for Civil Aviation Murlidhar Mohol chuan Air india flight AI 171 chetsual chhan chhui mekah firfiak-te inrawlhna a awm lo a ti.

Union Minister chuan thlawhna chetsual chhan chu huang zau taka an chhui thu leh tum lawk reng vanga chesual a ni em tih thlenga an chhui thu a sawi a, thlawhna chesual ta black box chu AAIB ten an kawh tawh thu leh thil chhui zui ngai zawng zawng ramchhunga tih vek a nih tur thu a sawi.

<><><>

UNION HOME MINISTER :

Union Home Minister Amit Shah chuan Maoists hel pawl a tel zawng zawngte chu sorkar hnena inpe thuai vek tura a duh thu a sawi.

Union Home Minister chuan Maoists te chu tunah an inpe lo a nih pawhin sorkar laipui chuan tun atanga chhiar a kum khat chhungin India ram chhunga a rawl rala che thinte chu nuai bo vek a tum thu a sawi a, India ram pumpuiah tharum thawhna pumpelh zel a nih theih nan sorkar laipui chuan beihpui a thlak vat tur thu a sawi bawh.

<><><>